

NA KEKEDELA FUAGERA TOOA JIU GI Na Wela nia a God.

¹ 'Ua na mai i nao, a God e bae fuana koo gia gi 'ana si kadamanga e 'oro ma 'ana si doo 'e'ete gi sulia profet gi. ² Ma 'ana fe dani naa gi i 'isi, nia ka bae 'ana fuaga sulia na Wela nia. Ma i sulia na Wela nia naa, a God e haungainia na doo gi sui, ma ni nia laugo a God e fili nia 'uria toolaa 'ana na doo gi sui. ³ Na Wela nia a God naa, nia e faatainia na raralaa a God 'initoo, sulia daaro bobola go. Ma laugo, sulia na mamanaa 'ana baelana Wela nia a God naa, nia ka ladoa na doo gi sui 'uria langi kasi sui. Ma i buira nia lafua naa na aade ta'alaa gia, nia kafi ooli fui langi, ma ka gwouru i bali aaolo nia a God na e 'initoo baita ka tasa.

Na Wela nia a God e baita ka tasa.

⁴ A God e faa'initooa na Wela nia ka tasa liufi na ensel gi, iilingia laugo na hatana e falea fuana Wela nia e baita liufia na hata na e falea fuagera. ⁵ Sulia a God e bae 'urii fuana Wela nia, <<'Oe na Wela nau, i tara'ena nau kuka aalua na Maa 'oe.>> Sui a God e langi kasi bae 'ua go 'urinae fuana ta ensel. Ma a God ka bae laugo 'urii sulia na Wela nia, <<Tara i nau naa na Maa nia, ma tara i nia na Wela nau.>> Sui a God e langi kasi bae sulia ta ensel 'urinae.

⁶ Ma si kada e garangi fuana a God ka oodua mai na Wela uulunao nia fui laona molaagali, nia

ka bae 'urii, <<Na ensel nau gi sui daka foosi nia.>> ⁷ Sui sulia ensel gi, a God ka bae 'urii, <<Na ensel nau gi na da rao fuagu, nau ku aadea gera ka bulasi daka hau 'ana na ooru gi ma na eere gi.>>

⁸ Ma sulia na Wela nia, a God e bae 'urii, <<I 'oe naa a God, ma na 'Initooa 'oe tara nia ka totoo firi. Ma 'oe 'oko 'initoo 'usia tooa 'oe gi 'ana 'o'oloa. ⁹ 'Oe 'o rakediana fuana taa naa e 'o'olo gi, ma 'o mamagu 'ana taa naa e ta'a gi. Ma sulia si doo naa, i nau a God 'oe ku fili 'oe, ma ku falea naa laugo na eelea baita fuamu 'ana faabaitalaa e tasa liufia kuka falea fuana oote ruana 'oe gi.>>

¹⁰ Ma a God e bae laugo fuana Wela nia 'urii, <<Lord 'ae, 'ana hafalilana mai, 'oe 'o haungainia na aanofuu, ma 'ana 'abamu gi i talamu, 'oe 'oko haungainia na mamangaa. ¹¹ Ma sui boro tara doo nae gi ka funu, i 'oe 'oko mouru totoo firi. I gera tara gera ka ta'a iilingia si maku kwali. ¹² Ma tara 'oko kosuda iilingia da kosua si maku. Tara 'oe 'oko oolisida iilingia si maku. Ma ni 'oe mone, langi 'osi tatala, ma na mourilamu ka langi si sui.>>

¹³ Haia, ma a God ka bae 'urii lau fuana Wela nia, <<'O gwouru i bali aaolo 'ani nau, lea ka dao 'ana si kada ku aadea 'oe 'oko saitasa 'ana maalimaea 'oe gi.>> Haia, ma a God langi kasi bae 'urinae fuana ta ensel.

¹⁴ Haia, ma na taa gi na gera ensel gi? Ensel gi gera na aanoodoo gi na da rao fuana a God. A God e oodu gera 'uria 'adomilana tooa gi na i nia e faamouru gera.

Na mouria.

2

¹ Ma 'aena naa na, gia ka dau diana faafia na faatolomaia mamana gi na gia rongoa sui naa sulia Wela nia a God, aata gia ka manata mamana 'ana ta faatolomaia susuge. ² Na kwaieresia gi na ensel gi da falea fuana koo gia gi, nia na doo mamana gi sui go. Ma ni tei naa e langi kasi roosulia, a God e falea naa na kwaelaa na e 'o'olo go fuana. ³ Nia e 'urinae laugo, lea gia aaburongo 'ana faatolomailaa sulia na kwaifaamourilaa a God, langi gia si tafi faasia si kwaelaa nia. Sulia a Lord Jesus i talana nia e 'ainitalo 'ana kwaifaamourilaa nae i totongenao. Ma na tooa gi na da rongoa nia, gera haea fuaga, daka faatainia na kwaifaamourilaa mamana naa. ⁴ Ma a God laugo, nia ka faamamanaa na faatolomailaa nae. Sulia nia ka falea si mamanaa fuada eeri daka aadea doo kwaibalatana gi ma na doo ni kwelelaa 'e'ete gi kwailiu. Ma nia ka falea laugo na haitamadoolaa gi fuada faasia na Aanoedoo Aabu iilingia nia e dooria.

A Jesus e faamouri gia.

⁵ God e langi kasi filia na ensel gi 'uria na baitalaa 'usia na molaagali faalu na tara ka dao mai, na molaagali na melu faarai sulia. ⁶ Sulia ta bali Kekedelaa Aabu e haea 'urii, <<God 'ae, na iimola doo 'utaa na 'oko manata fuada? Sulia gera iimola gi go 'ana. Ma e 'utaa na 'oko aadasuli gera? ⁷ 'Oe 'o aade gera daka to'ou i farana ensel gi 'ana si kadamanga kukuru. Ma 'oko faa'initoo gera, ma 'oko faabaita gera, ⁸ ma 'oko aalu gera ka baita 'usia na doo gi sui.>>

Haia, na Kekedelaa nae ka haea a God e aalua tooa ka baita 'usia na doo gi sui. Nia e faatainia na tooa gi tara daka baita 'usia na doo gi sui a God e haungaida. Sui 'ana si kada naa, gia langi si rikia 'ua na tooa na da baita 'usia doo gi sui. ⁹ Ma ka 'urinae boro, gia haitamana a Jesus 'ana na e 'initoo. A God e aalu nia ka hau 'ana wane ka to'ou i farana ensel gi 'ana si kadamanga kukuru go, eeri nia ka mae 'uria faamourilana tooa gi sui, sulia na rakedianalaa a God. Ma 'ana si kada nae, a God ka faa'initoo nia ma ka faabaita nia, sulia na maelana. ¹⁰ A God e haungainia na doo gi sui, ma nia laugo ka ladoa na doo gi sui. Ma nia ka faalamainia a Jesus ka nonifii ma ka mae. Sulia 'ana filana a Jesus, a God e faasuia na raolaa Jesus, na wane na e faamouri gia. A God e ilia na doo nae hai so ka aalua tooa 'oro daka hau 'ana wela nia gi ma daka 'initoo iilingi nia. Na raolaa nae a God nia 'o'olo teefou.

¹¹ A Jesus e faafaalua tooa gi faasia doo ta'a gera gi. Nia naa gera fai nia a Jesus, gera ka too 'ana tee Maa. Nia naa e aadea Jesus kasi 'ida 'uria aalangilada 'ana haasina gi. ¹² Ma a Jesus e bae 'urii fuana a God, <<Nau tara kuka faarongo 'ana fuana haasigu gi 'ana si doo gi 'oe 'o aadedada gi, ma tara kuka baelafe 'oe i laona figua gera.>> ¹³ Nia ka bae laugo 'urii, <<I nau tara ku fiitoo 'ana a God.>> Ma ka bae laugo 'urii, <<I nau i seegi, fai gera na wela gi na a God e faleda fuagu.>>

¹⁴ Ma sulia gia na wela nae gi gia iimola gi na gia too 'ana noni, Jesus laugo e aalu noni ma

ka hau 'ana wane iilingi gia. Nia e iili 'urinae eeri, 'ana na maelana, nia labasia a Satan na gwoufutana maea. ¹⁵ Ma 'urinae a Jesus ka lukea na tooa gi na a Satan e baita 'usida sulia na moulaa gera 'ana maea. ¹⁶ Gia haitamana e langi lau na ensel gi na a Jesus e 'adomida 'urinae. Sulia na Kekedelaa Aabu e haea na 'urii, <<Nia e 'adomia na kwalafaa a Abraham gi.>> ¹⁷ I 'aena na si doo naa, nia ka aalu nia ka iilingia teefou na haasina gi, eeri nia ka aalua Fooanigwou gia na e diana ma ka kwaimanatai fuaga ma ka rao fuana a God, hai so a God ka manata lukea na doo ta'a gia gi. ¹⁸ Ma 'ana si kada naa, nia ka bobola fai nia 'adomilana na tooa gi na a Satan e iilitooda, aata daka iili ta'a. A Jesus e haitamana iililana doo naa, sulia a Satan e iilitoona laugo ma nia ka nonifii laugo iilingia tooa gi sui.

Jesus naa e liufia a Moses.

3

¹ Waihaasi aabu gi 'ae, a God e aadafili gia. Haia, muka manata sulia a Jesus, na a God e oodua mai lao molaagali naa eeri nia ka aalua na Fooanigwou na gia manata mamana 'ana. ² A Jesus e roosulia teefou na kwaidooria gi sui a God, na e aadafilia 'uria Fooanigwou, iilingia laugo a Moses naa e roosulia si kada nia ka rao fuana a God lao Beu Aabu nia. ³ Haia, na wane na e tole beu, gera baelafe nia liufia na beu. Ma 'urinae laugo, a Jesus e baita liufia a Moses. ⁴ Gia haitamana lea hasa gia rikia ta beu, tama ta wane laugo na e haungainia. Ma a God

naa e haungainia doo gi sui. ⁵ Ma a Moses, nia roosulia a God si kada nia rao i lao Beu Aabu a God. Ma nia ka faarai sulia na doo gi tara a God ka bae 'ana kada nia 'ua mai. ⁶ Haia, ma a Christ mone, nia Wela a God, ma na raolaa nia e diana 'uria na babaitaa 'usia Beu Aabu a God. Ma i gia, gia naa na Beu Aabu a God, lea so gia ka tasa dongaa 'uria manata mamananalaa ma na kwaimaasi ngadolaa 'uria na doo diana gi na a God tara ka falea fuaga.

Na mamaloo fuagera tooa a God gi.

⁷ Nia naa, na Aanoedoo Aabu e bae 'urii, <<I tara'ena, lea gamu rongoa na baelana God, ⁸ musi faangasia na mango gamu iilingia na koo gamu gi 'ana si kada gera oote gera 'ana God, 'ana si kada gera aaburongo 'ana God i aanogwou. ⁹ Ma a God e bae 'urii, <Sui boroi 'ana da rikia na doo kwaibalatana gi na ku iilida sulia fai aakwala fe ngali, gera iilitoogu haso ka tau 'utaa na kusi falea kwakwaelaa fuada sulia na aabulolaa ta'a gera gi. ¹⁰ I 'aena na rakegu ka hasui gera, ma kuka bae 'urii, Gera aaburongo 'ani nau, ma gera ka oote gera 'ana roolaa sulia na kwaieresia nau gi. ¹¹ Haia, na rakegu ka hasu, ma kuka bae aalualu 'urii, E 'afetai gera ka ruu lao fera na kuka aade aagau 'ana eeri gera ka mamalo 'ana.>>>

¹² Haia, waihaasi gi 'ae, muka aadasuli gamu i talagamu, aata ta wane 'ani gamu na manataa nia ka ta'a ma kasi fiimamana 'ana Christ ma ka eegwa naa 'ana God na e momouri. ¹³ Ma lau 'ana, muka 'adomi gamu kwailiu 'ana si kada nae na na Kekedelaa Aabu e 'alangia 'ana

<<tara'ena>>. Muka iili 'urinae, aata ta wane 'ani gamu ka manata mamana 'ana sugea sulia aade ta'alaa ma na mangona ka ngasi 'ana oote nialaa 'ana a God. ¹⁴ Sulia gia sui, lea so gia ka tasa dongaa 'ana fiimamanalaa gia 'ana Christ lelea ka dao 'ana si kada 'i'isi, iilingia baa i totongena, gia ka oofu fai nia a Christ.

¹⁵ Sulia na Kekedelaa Aabu e bae 'urii, <<I tara'ena, lea gamu rongoa na baelana God, musi faangasia na mango gamu iilingia na koo gamu gi 'ana si kada gera oote gera 'ana God.>>

¹⁶ Haia, ma ni tei gera na da rongoa sui naa baelana God, ma gera ka oote gera 'ada 'ana? I gera na tooa i Jiu gi baa a Moses e talai gera faasia fera Ejipt. ¹⁷ Ma ni tei gera na tooa a God e rakehasui gera sulia fai aakwala fe ngali? I gera na tooa na da mae lao aanogwou sulia na aade ta'alaa gera gi i seenae. ¹⁸ Haia, ma ni tei gera 'ana na tooa na God e bae aalualu suli gera 'urii, <<E 'afetai gera ka ruu lao fera na kuka aade aagau 'ana eeri gera ka mamalo 'ana>>? A God ka bae sulia na tooa nae na gera ka oote gera 'ani nia. ¹⁹ Haia, gia haitamana e langi dasi bobola 'uria ruulaa lao fera nae, sulia gera dasi manata mamana 'ana God.

4

¹ Ma sui boroi 'ana na tooa nae dasi bobola 'uria ruulaa lao fera nae 'uria mamalolaa, na bae aalualua a God e too 'ua. Ma i gia naa, a God e soe gia eeri gia ka ruu 'uria mamaloa fai nia. Nia naa, gia ka aada diana suli gia, aata ta tee iimola 'ani gia ka langi si ruu i seenae. ² Sulia i

gia rongoa sui naa laugo na Faarongolaa Diana iilingia na koo gia gi mai nao. Sui boroi 'ana gera ka rongoa sui naa na faarongolaa nae, sui ka langi si 'adomida, sulia si kada gera rongoa 'ana, gera dasi manata mamana go 'ana. ³ Haia, ma ni gia, na gia manata mamana sui naa, gia ka ruu i seenae 'uria na mamalo fai nia God. Sulia nia e bae 'urii, <<Na rakegu e hasu, ma kuka bae aalualu 'urii, <E 'afetai gera ka ruu lao fera na kuka aade aagau 'ana eeri gera ka mamalo 'ana.>>> A God e bae 'urinae, boroi 'ana nia e aade aagau naa 'ana gula ni mamalo, sulia nia ka faasuia naa na raolaa nia 'ana si kada nia haungainia 'ana na molaagali. ⁴ Sulia na Kekedelaa Aabu e bae sulia na fiuna maedani ka 'urii, <<'Ana fiuna maedani, a God e mamalo 'ana raolaa nia gi.>> ⁵ Ma na Kekedelaa Aabu e bae lau sulia ka 'urii, <<E 'afetai gera ka ruu lao fera na ku aade aagau 'ana eeri gera ka mamalo 'ana.>> ⁶ Na tooa na da rongoa na Faarongolaa Diana totongenao, e langi dasi ruu mai 'uria mamalolaa, sulia langi dasi manata mamana. Nia naa, gia ka haitamana, teni tooa aai tara a God ka faalamaida 'uria ruulaa 'uria mamalolaa. ⁷ Sulia a God e aalua naa si kada 'uria ruulaa 'uria mamalolaa. Ma a God ka 'alangia si kada nae <<tara'ena>>. Sulia tau na mai buira kada na tooa naa i nao gi dasi manata mamana, a David e kedea na baelana a God lao Kekedelaa Aabu na ku haea na sui ka 'urii, <<I tara'ena, lea gamu rongoa na baelana God, musi faangasia na mango gamu.>>

⁸ Haia, ma fuagera tooa gi nao, lea so a Josua ka falea na mamaloa nae na a God e bae aalualu

'ana, a God kasi bae buri lau sulia tesi kada 'ete. ⁹ Nia naa, gia haitamana na mamalolaa fuana tooa a God gi nia e too 'ua, iilingia a God ka mamalo 'ana fiuna maedani. ¹⁰ Sulia so ni tei go na e mamalo fai nia a God, nia ka mamalo teefou 'ana raoa nia gi, iilingia laugo a God naa e mamalo kada nia faasua raoa nia 'ana haungailana molaagali. ¹¹ E 'urinae, i gia ka hasi tatangai eeri gia ka ruu 'ana si gula ni mamaloa nae a God e aade aagau 'ana, aata ta iimola 'ani gia ka langi si bobola 'uria ruulaa, iilingia na tooa gi i nao na dasi ruu sulia e langi dasi manata mamana.

¹² Haia, na baelana God e iilingia ta doo momouria, sulia nia iilia na doo baita gi. Ma na baelana God e iilingia ta naefe baita baa e 'ala roo bali, sulia e iilingia ka 'oto ka ruu i laona manatalaga gi fai nia i laona mourilaga gi, sulia e faatainia fuaga na taa naa e diana ma taa naa e ta'a i laona manataga fai nia i laona kwaidoorilaga. ¹³ E langi ta iimola kasi bobola 'uria aagwalana tesi doo faasia a God. Sulia a God e aada ka rikia na doo gi sui, boroi 'ana i laona na manatana tooa gi sui. Ma tara nia ka aadea gia ka faarongo 'ani nia na doo gi sui na gi iilida.

Jesus nia na Fooanigwou baita.

¹⁴ Haia, sulia si doo nae gi, gia ka tasa dongaa 'ana manata mamanaa na gia faarai sulia. Sulia gia too 'ana Fooanigwou baita na e bae oolisi gia i maana a God. Nia naa na a Jesus, na Wela a God. ¹⁵ Ma a Jesus nae, na Fooanigwou gia, e haitamana sui naa na makesolaa gia gi ma

na kwaimanatailaa gia gi, sulia nia e liufia sui naa na iilitooa gi sui iilingia a Satan e iilitoo gia. Ma boroi 'ana a Satan ka iilitoona a Jesus, a Jesus kasi aadea tesi doo ta'a. ¹⁶ Nia naa, langi gia kasi mou 'uria lealaa mai siana a God, na e rakediana fuaga. Sulia nia tara ka kwaimanatai fuaga ma ka 'adomi gia kada gia ka daotoona 'ana na 'afetaia.

5

¹ Haia, lea so ta wane da fili nia faasia na wane gi fuana ka Fooanigwou, tara gera tagofale nia naa 'uria na daolaa naofana God ma nia ka aalua wane babae oolisia na tooa gi. Ma na raolaa nia laugo, nia ka falea na falelaa gi fai nia na kwaisuusia gi fuana a God eeri a God ka manata lukea na aabulolaa ta'a gera tooa gi. ² Ma sulia na Fooanigwou nia naa na wane go 'ana ma ka iilia doo gi ka garo, nia e haitamana ka harofaia fuagera tooa na da lalafusidoo ma daka garo. ³ Ma i sulia na garolaa nia gi i talana, nia e diana fuana ka falea kwaisuusia gi eeri a God ka manata lukea na aade ta'alaa nia fai nia na aade ta'alaa gera tooa gi. ⁴ Ma langi ta iimola kasi aadafili nia i talana eeri ka iilia na raolaa baita 'uria na Fooanigwoulaa.)(Sulia a God 'ana na e filia, iilingia baa e filia a Aaron 'ua na mai.

⁵ Nia e 'urinae laugo, a Christ nia kasi fili nia i talana haia ka Fooanigwou, eeri nia ka too 'ana raoa baita nae. Ma lau 'ana, a God 'ana na e filia Christ, sulia a God e bae 'urii fuana, <<I 'oe na Wela nau, ma i tara'ena kuka aalua Maa 'oe.>>

⁶ Ma a God ka bae lau 'urii laona tee Kekedelaa

Aabu aai ka 'urii, <<Tara ni 'oe 'oko fataabu totoo firi, iilingia a Melkisadek.>>

⁷ Haia, ma 'ana si kada a Jesus e too 'ua lao molaagali naa, nia ka fooa rigita, ma ka aangi fuana a God, na wane na e haitamana faamourilaa. Ma sulia a Jesus e faato'ou nia i talana ma ka manata baita 'ana a God, a God ka rongoa na fooalaa nia. ⁸ Sui boro'i 'ana nia na Wela God, na 'afetaia gi na nia e liufida, nia faatolomai nia 'uria na roolaa sulia kwaieresia God gi. ⁹ Ma si kada a Christ e liufia sui naa na doo gi sui na a God e manata 'uria, nia ka aalua faamouri fuana tooa gi sui na daka roosuli nia, eeri gera ka ngalia na mouria na e too firi. ¹⁰ Ma a God ka haea a Christ naa Fooanigwou, iilingia a Melkisadek na fataabu.

Na baea fifilaa suusia na manata eegwalaa 'ana fimamanalaa.

¹¹ Haia, ma si doo 'oro 'ua na e too na gemelu doori bae sulia fuagamu sulia na doo nae. Sui taa, e 'afetai fuana faatolomailagamu 'ana, sulia musi bobola fuana haitamanalana 'ali'ali. ¹² I gamu mu manata mamana 'ana Jesus e tau na mai, ma e too naa fuagamu haso muka aalua na wane faatolomai gi. Sui ma ka langi, sulia mu dooria 'ua ta wane 'ete lau ka faatolomai gamu lau, eeri muka haitamana na faatolomaia na e waluda na ka hagatafa mai faasia baelana a God. Nia iilingia mu susu 'ua sulia e langi musi bobola 'ua fai nia na 'anilana fanga ngasi gi. ¹³ 'Ana si kada na iimola ka gala wela 'ua, si fanga na nia 'ania naa na susu, ma e langi si haitamana 'ua na faatolomailaa sulia na 'o'oloa. ¹⁴ Sui 'ana kada na

iimola e baita 'ana, nia kafi haitamana 'anilana fanga ngasi gi, ma ka haitamana naa na taa naa e diana gi ma na taa gi naa e ta'a gi.

6

¹ Nia naa, gia gi nani ka tau naa nae 'ana faatolomaia na e waluda sulia a Christ, ma nia bobola naa. Haia, e too naa 'ana fuaga gia ka oofu fai nia na nanilaa 'uria tofungee) (faatolomaia 'afetai gi. Gia ka too faasia nani ooliolilaa go na doo gi na da faatolomiania)('ua mai, iilingia na oolitai manatalaa faasia na rao tatagwai gi ma na manata mamanalaa 'ana God.

² Gia ka too faasia nani ooliolilaa lau sulia na siuabulaa gi, ma na aalu 'abalaa faafia na tooa gi, ma na tataea faasia na maea, ma na ketolaa na totoo firi. ³ Ma lau 'ana, gia ka hasi tatangai 'uria nanilaa 'uria doo 'afetai gi. Ma lea so a God ka faalamainia fuaga, nia bobola fuaga.

⁴ Na tooa na gera manata mamana, lea so gera ka eekwatainia na fiimamanalaa gera gi, 'afetai fuana daka oolitai manata lau haia gera ka manata mamana lau. I nao mai, 'ana si kada gera ka manata mamana 'ua, gera ka too i laona raralaa a God. Ma gera ka haitamana sui na taa gi na tara gia ka ngalia i langi, ma gera ka ngalia sui na Aanoedoo Aabu haia ka too fai gera. ⁵ Ma gera ka haitamana laugo na doo diana gi sulia na baelana God. Ma gera ka rikia laugo na mamanaa na a God ka faatainia 'ana fe dani gi na tara ka dao mai. ⁶ Ma sui boroi 'ana na doo nae gi ka fuli fuada, gera ka aabulo faasia na fiimamanalaa gera 'ana a God. Haia, e

'afetai fuana 'adomilaa gera fuana gera ka oolitai manata lau. Sulia iilingia gera fotoia naa lau na Wela God i fafona 'airarafolo, ma gera ka aadea na tooa gi daka iiseri naa 'ani nia.

⁷ Haia, na tooa gi da iilingia na gano, na uuta e 'aru fafona 'ana si kada 'oro gi. Lea ta 'ai diana na ta iimola e fasia ma ka bulao i seenae, tara a God ka faadianaa na gano nae. ⁸ Ma lea so na 'ai totoe gi ma langi na lolo kwasi gi go 'ana ka bulao, na gano nae ka too tatagwai go 'ana, ma tara a God ka falea na kwakwaelaa fuana gano nae, ma ka suungia.

⁹ Haia, ruana gi 'ae, sui boroi 'ana na baea gemelu fuagamu ka 'urinae, gemelu haitamana go 'amelu na fimamanalaa gamu ka rigita ma ka langi si muu, sulia gamu too naa 'ana na doo diana ka tasa gi sulia na mouria faalu na a God e falea fuagamu. ¹⁰ Na kekedelaa a God e langi kasi garo. Nia tara langi si manata buro 'ana raolaa diana gi na mu iilida, ma nia tara ka langi si manata buro 'ana rakedianalaa gamu fuana na mu faatainia 'ana si kada mu 'adomia na tooa nia gi i nao 'ua mai ma 'ana si kada nae laugo. ¹¹ Ma na doorilaa gemelu naa, na gamu sui go muka tasa dongaa 'uria rao 'ago'agolaa lea ka dao 'ana fe dani 'i'isi, eeri gamu ka ngalia na doo gi sui na mu kwaimaasimaasida. ¹² Ma i gemelu si dooria hasa gamu ka hafalia noni eelalaa. Ma lau 'ana, muka iilifainia gera na tooa gi na da manata mamana 'ana a God ma daka gwaromaabe, ma 'urinae tara gera ka ngalia doo gi na a God e bae aalualu 'ana.

Na bae aalualua God.

13 Haia, muka manata fasi sulia Abraham. 'Ana si kada a God e bae aalualu fuana, nia ka faangasia na baelaa aalualu nia 'ana hatana i talana, sulia e langi ta iimola na e baita ka liufia a God 'uria faangasilana baea nae. 14 Ma a God ka bae 'urii, <<E mamana 'asianaa, tara kuka faadiana 'oe, ma tara ku aadea na kwalafaa 'oe gi ka 'oro.>> 15 Ma a Abraham ka gwaromaabe, ma nia ka ngalia na doo gi a God e bae aalualu 'ana. 16 Ma lea so ta iimola ka bae aalualu, nia ka faangasia 'ana hatana ta iimola na e baita liufia. Ma na tooa gi sui da manata mamana 'ana baelaa aalualu na nia ka faangasia 'urinae. 17 Haia, ma si kada a God e bae aalualu 'ana fuana Abraham, nia ka doori hasa na tooa gi na tara daka ngalia na doo nae gi daka haitama diana 'ana na nia tara ka faamamanaa na baelaa aalualu nia fuagera. Ma nia na aadea nia ka faangasia na baelaa aalualu nae. 18 Nia na roo doo gi ka too ma e 'afetai ka 'e'ete. Na eetana doo nae, na baea aalualua a God. Ma ruana si doo na faangasilana baelaa aalualu nia. Ma sulia na doo nae gi, gia haitamana e 'afetai a God ka susuge. Ma na doo nae gi ka kwaiarei gia na tooa na gia ka fiitoo 'ana a God eeri nia ka aadasuli gia, eeri gia ka tasa dongaa 'ana kwaimaasilaa maasia na doo diana gi na a God e bae aalualu 'ana. 19 Haia, na fiitoolaa gia 'ana a God ka faangasia na mourilaga, iilingia ta gwalu fou baa e faangasia ta faka baita eeri ka langi si lea 'e'ete ma langi si iigwaa. Ma gia ka fiitoo 'ana Jesus na e ruu mai la <<gula aabu fifii>> la Beu Aabu

a God. ²⁰ Sulia a Jesus ka aalua Fooanigwou na totoo si sui iilingia a Melkisadek. Ma nia ka ruu i nao 'ani gia la gula aabu eeri ka 'adomi gia.

Na fataabu Melkisadek.

7

¹ Haia, a Melkisadek nia na aaofia 'usia fera Salem,)(ma i nia na fataabu a God 'initoo tasa. 'Ana tee si kada, Abraham e firu fai gera fai wane aaofia gi, ma nia ka saitasa 'ani gera. Ma si kada Abraham e ooli 'ana fera, nia ka todaa Melkisadek sulia tala, ma a Melkisadek ka faadianaa a Abraham. ² Ma Abraham ka falea tangafuluna doo gi nia e lauda gi 'ana firua. (Haia, ma na malutana hata naa Melkisadek <<na aaofia 'ana 'o'oloa>>. Ma nia na aaofia 'usia na maefera i Salem,)(na malutana <<na aaofia 'ana fanualama>>.) ³ Ma e langi gia si haitamana go ni tei naa ni tee nia ma a maa nia ma na kwalafaa nia, ma gia si haitamana go ta uunua sulia na futalana ma langi na maelana. 'Aena na Melkisadek nia aada mala na Wela nia God, sulia e aada mala nia e langi ta hafalia ma e langi 'ana ta faasuilana, ma langi laugo na 'isilana raolaa nia 'ana fataabulaa.

⁴ Haia, muka manata fasi sulia na babaitaa nia, sulia na koo gia Abraham e falea na tangafuluna doo gi nia e lauda 'ana si kada nia firu liufia na maalimaea nia gi. ⁵ Haia, ma na kwalafaa 'ana Livae gi na da rao 'ana fataabulaa, na kwaieresia gi e haea gera ka ngalia na tangafuluna bali totodaa faasia wane futa gera na Jiu gi, sui boroi 'ana na gera tae laugo mai faasia kwalafaa

Abraham. ⁶ Haia, a Melkisadek kesi hagatafa mai faasia 'aebara na Livae gi. Ma sui boroi 'ana si doo nae, nia ka ngalia go 'ana tangafulu 'ana doo gi na Abraham e lauda, ma ka faadianaa a Abraham. A Melkisadek e iili 'urinae, sui boroi 'ana a Abraham naa a God e bae aalualu fuana. ⁷ Ma gia sui gia haitamana, na wane na e falea faadianalaa ni faaabua fuana ta wane aai lau, nia e baita ka liufia na wane naa. ⁸ Haia, i gera na fataabu gi na da lea mai faasia kwalafaa Livae, gera ngalia na tangafuluna doo gi sui, sui boroi 'ana tara gera ka mae go 'ada. Sui a Melkisadek mone, nia e ngalia na tangafulu 'ana doo gi a Abraham, ma gia haitamana na Kekedelaa Aabu e haea a Melkisadek e mouri 'ua. ⁹ Ma gia ka haitamana laugo kada Abraham falea na tangafulu 'ana bali 'ana doo gi fuana Melkisadek, a Livae, na kwalafaa nia gi da haitamana ngalia na tangafululaa 'ana si kada nae, nia iilingia e falea laugo fuana Melkisadek. ¹⁰ Sulia kada a Abraham e kwaitodai fai nia Melkisadek, a Livae langi si futa 'ua, ma e iilingia nia 'ua laona nonina Abraham na koo nia.

¹¹ Haia, gia haitamana kada God e falea na kwaieresia gi fuagera tooa i Jiu gi, nia ka filia fataabu gi na da lea mai faasia Livae eeri gera na daka baita 'usia na kwaieresia nae gi. Ma lea so ka waluda fuana fataabu nae gi daka aadea na tooa gi gera ka 'o'olo 'ana raoa gera gi, a God kasi dooria oodua mai ta fataabu lau iilingia Melkisadek, ma i nia langi kasi uusulia Aaron na e lea mai faasia kwalafaa Livae. ¹² Sulia 'ana kada gera oolisi gera fataabu gi, nia e bobola gera

ka oolisia laugo na kwaieresia gi na gera dau mai 'ana. ¹³ Ma a Lord Jesus na nau ku bae sulia, nia langi kasi haga mai faasia Livae, ma e langi ta wane lau 'ana 'aebara nia ka aalua fataabu. ¹⁴ Sulia gia haitamana a Jesus e futa mai faasia kwalafaa nia a Juda. Ma a Moses e langi kasi faatolomainia go haso na wane 'ana 'aebara nae daka aalua fataabu gi.

Ta fataabu lau iilingia Melkisedek.

¹⁵ Haia, ma ni gia gi haitamana doo nae gi e folaa 'asianaa, sulia ta wane fataabu e hagatafa mai na e iilingia a Melkisedek. ¹⁶ Ma na fataabu faalu naa e langi lau ta fataabu sulia na malutanaa kwaieresia gi lao molaagali naa. I nia na fataabu sulia na mamanaa 'ana mouria firi ta wane. ¹⁷ Sulia na Kekedelaa Aabu e haea, <<'Oe naa fataabu na 'oko too dongaa firi naa 'amu mala a Melkisedek.>> ¹⁸ Gia ka haitamana sui na kwaieresia gi 'ua baa mai nao, a God e oolisida sui, sulia e langi si 'adomi gia ma ka tatagwai go 'ana. ¹⁹ Sulia na kwaieresia gi na a Moses e falea, nia e 'afetai ka 'olosia tesi doo. Ma 'ana si kada nae, a God e falea sui naa fuaga na tala diana lau eeri gia ka lea mai siana.

²⁰ Ma laugo, na tala faalu naa e diana ka tasa, sulia a God e bae aalualu fifii 'ana si kada nia aalua Jesus ka fataabu. 'Ana si kada nia aalua na kwalafaa a Livae daka fataabu gi, nia langi go ta bae aalualulaa 'urinae. ²¹ Ma a Jesus mone, a God e aalua fataabu 'ana bae aalualulaa fuana, sulia na Kekedelaa Aabu e haea, <<A Lord e bae aalualu, ma 'afetai nia ka oolitai manata: <'Oe tara 'oko fataabu totoo firi.>>> ²² Ma sulia na

baea aalualu naa, gia haitamana na tala faalu na a Jesus e baita 'usia, nia diana liufia na tala i nao.

²³ Haia, tee doo lau na aadea gia haitamana na tala faalu na e diana ka tasa. Sulia na fataabu gi 'ua mai da 'ita mai faasia kwalafaa Livae e bobola gera ka 'oro sulia lea ta wane 'ada e mae, nia ka waluda go 'ana fuada 'uria na oolisilana 'ana ta wane aai lau. ²⁴ Ma Jesus mone totoo si sui naa, ma na mouria nia ka totoo firi, ma e too langi kasi oolisi naa 'ana raoa fataabu. ²⁵ Sulia ka 'urinae, e waluda go 'ana fuana ka faamouria na tooa gi na da lea mai siana a God 'ani nia 'ana si kada gi sui. Sulia a Jesus e mouri totoo firi haia ka 'adomi gera i maana God.

²⁶ Haia, sulia na doo nae gi, a Jesus naa a doo baa e Fooanigwou na gia dooria, sulia nia e aabu 'asianaa ma ka 'o'olo teefou ma e langi ta ta'alaa 'ani nia. A God e ngali nia faasia na tooa ta'a gi, ma ka aalu nia ka too i langi. ²⁷ Nia e langi kasi iilingia na Fooanigwou baa gi nao. Sulia na Fooanigwou baa gi nao, gera haitamana aadea ta'alaa gi, sulia gera iimola gi go 'ada. Nia na aadea gera ka falea kwaisuusia gi sulia dani 'uria lafulana na aade ta'alaa gera gi, suifetei gera ka falea kwaisuusia gi 'uria lafulana na aade ta'alaa gera tooa 'e'ete gi. Ma a Jesus mone, e langi si dooria iili 'urinae, sulia nia kasi too 'ana ta'alaa. A Jesus e falea na mourilana 'uria tee kwaisuusia nia 'ana tee si kada go, ma ka langi si kwaisuusi lau. ²⁸ Na kwaieresia gi faasia a Moses, nia filia na tooa gi na da too 'ana aade ta'alaa gi eeri gera ka aalua fataabu gi. Sui e tau na mai i buira na

Kwaieresia nae gi, a God ka bae aalualu fifii ma ka filia na Wela nia na e faatainia nia e 'o'olo teefou ma ka too firi.

Jesus na Fooanigwou gia.

8

¹ Haia, na malutana doo naa gi melu bae sulia fuagamu e 'urii, na Fooanigwou gia e diana ka tasa, ma nia ka gwouru 'ana bali aaolo 'ana God 'initoo mai langi. ² Nia iilia na raoa na Fooanigwou i laona gula aabu fifii la Beu Aabu mamana na a Lord e tolea, ma langi lau na iimola gi na da tolea.

³ A God e aadafiliala na Fooanigwou gi sui eeri gera ka falea na kwaisuusia fuana a God. Nia ka 'urinae laugo na Fooanigwou gia e too 'ana tesi doo ni kwaisuusia. ⁴ Lea na Fooanigwou gia ka too i aano, nia kasi rao 'ana fataabu, sulia gia too naa 'ana fataabu 'oro gi na da falea na doo gi na kwaieresia gi faasia a Moses e haea. ⁵ Sui na raoa gera gi e iilingia go 'ana na nunuidoo, sulia da iilifai nia go 'ada doo mamana na e too mai langi. Ma nia 'urinae laugo fuana Moses, sulia si kada nia e garangi tolea na babala 'ana maku a God, a God e haea fuana ka 'urii, <<'Oko iilifai 'o'olo 'ana doo i langi na ku faatainia fuamu gwouna tolo.>> ⁶ Haia, na raoa nia Jesus 'uria fataabu e diana liufia ta fataabu gi na i seegi aano. Ma e 'urinae laugo, na tala faalu na nia ka haungainia eeri a God ka faamouria na tooa gi, nia e diana ka liufia na tala baa i nao. Sulia na tala faalu naa, a God e faangasia naa 'ana bae aalualulaa gi sulia na doo gi na e diana ka tasa.

⁷ Ma lea so e langi ta garolaa 'ana tala baa i nao, a God ka langi si oolisia lau 'ana ta tala faalu. ⁸ Haia, a God e ngatafia na tooa nia gi 'ana si kada nia e haea, <<I nau a Lord, ma 'ana tesi kada na e nia 'ua mai tara ku aalua ta tala faalu fuana kuka faamouria 'ana tooa Jiu gi. ⁹ Ma na tala faalu nae, tara langi si iilingia go na tala i nao na ku falea fuana koo gera gi tau na mai 'ana kada ku talai gera mai faasia fera Ejipt. Gera dasi roo go sulia tala nae. Ma sulia si doo nae, nau kuka faiburi 'ani gera. ¹⁰ Na tala faalu nae tara kuka aadea eeri kuka faamouria 'ana tooa Jiu gi e 'urii: Nau tara ku aalua na kwaieresia nau gi i laona manatada, ma kuka kedea la mourilada. Ma nau a Lord tara nau na God gera, ma i gera daka aalua tooa nau gi. ¹¹ Ma tara langi gera kasi dooria naa ta wane lau haia ka faatolomai gera suli nau. Sulia 'ana maedani nae, na tooa gi sui, na tooa baita gi ma na tooa to'ou gi, tara daka haitamagu. ¹² Ma nau tara kuka manata lukea na aade ta'alaa gera gi, ma kuka manata buro 'ana na garolaa gera gi.>>

¹³ Haia, sulia a God e bae sulia na tala faalu nae, nia ka faatai nia na tala baa i nao nia e kwali naa. Ma gia ka haitamana lea tesi doo na e kwali naa, tama tara ka sui naa.

Na fooalaa i aano ma i langi.

9

¹ Haia, 'ana tala mai nao eeri a God ka faamouria na tooa gi, a God ka eeresia fooalaa 'utaa 'ani nia, ma nia ka faatolomai laugo sulia na Beu Aabu i seegi aano. ² Gera ka tolea na

Beu Aabu nae 'ana maku, ma ka too 'ana roo kade beu gi. Na eetana kade beu da 'alangia 'ana <<gula aabu>>. Ma daka aalua na laeta i seenae, fai nia na tafe fuana aalulana beredi 'uria falelana fuana God ka too i fafona. ³ Ma gera ka kulua laugo na maku i oogotouna roo kade beu nae gi. Haia, ma na ruana kade beu da 'alangia 'ana <<kade gula aabu fifii>>. ⁴ Ma i laona kade beu nae da aalua na fuliere na da haungainia 'ana gold. Ma i fafona fuliere nae da suungia 'ana 'ai momoko. I seenae laugo da aalua tee kufi doo baita 'uria aalu doolaa na da suufaafia 'ana gold. Na kufi doo baita naa na mamalafooa 'ana baea aalualua God. Ma i laona kufi doo baita nae tee teu da haungainia 'ana gold, ma i seenae da aalua na fanga na da 'alangia 'ana <<mana>>. Ma i laona kufi doo baita nae laugo, daka aalua na kubo(a)(baa a Aaron baa e bulao ma roo fou dedema gi a God e kedea 'ana kwaieresia gi. ⁵ Haia, ma na kufi doo baita nae da aalua i farana roo doo nunuidoo ensel gi na da too 'ana kukubae doo gi na mamalafooa 'ana a God e too i seenae. Na kukubae doo nae gi naa na doo nae gi da 'ifi i fafona na gula na a God e lafua na garolaa gera na tooa gi. Sui nau kusi talamatai diana go sulia na doo nae gi 'ana si kada nae.

⁶ Haia, 'ana si kada gera aade aagau 'ana doo 'urinae gi sui, na fataabu gi gera ka ruu lao eetana kade beu sulia dani 'uria iililana na raoa gera gi. ⁷ Haia, na ruana kade beu na da 'alangia 'ana <<gula aabu fifii>>, tee wane na e ruu go na a Fooanigwou, ma i nia e ruu i seenae 'ana tee si kada go laona fe ngali. Ma si kada nia e ruu

'ana, nia ka ngalia na 'abu fuana ka kwaisuusi 'ana 'uria na lafulana garolaa nia gi ma laugo na garolaa na tooa gi na da iilida gi 'ana si kada dasi haitamana daka iilia doo ta'a gi. ⁸ Haia, ma 'ana doo nae gi, na Aanoedoo Aabu e faatolomai gia hasa e 'afetai gia ka ruu 'ua i laona ruana kade beu nae na da 'alangia 'ana <<gula aabu fifii>>, sulia na eetana kade beu e too 'ua. ⁹ Haia, nia na mamalafooa na e faatolomai gia sulia tee doo 'ana si kada naa. Nia e faatolomai gia 'ana na falelana na falelaa gi fai nia na kwaisuusia 'ana doo fai 'ae gi langi si lafua go na garolaa gera tooa gi na da fooa ma langi gera kasi 'o'olo 'ua. ¹⁰ Sulia na malutana fooalaa naa fuana God e sulia go 'ana fanga, gwoua, ma na faafaalulana noni. Na doo nae na kwaieresia gi na tooa gi da lea sulia 'ana bali i maa 'ana noni, ma doo nae gi ka liu baita go 'ana lea ka dao 'ana si kada a God ka oolisia 'ana tala faalu.

¹¹ Haia, 'ana si kada naa a Christ e dao naa mai 'uria iililana na raoa nia Fooanigwou 'ana tala faalu na e diana liufia tala i nao. Na Beu Aabu na nia e rao i laona, nia e diana tasa ma ka baita liufia na Beu Aabu i aano. Na wane kasi tolea na Beu Aabu nae, sulia e langi kasi too la molaagali naa i aano. ¹² Ma a Christ e ruu go 'ana tesi kada i laona <<gula aabu fifii>> na e too mai langi, ma e langi kasi ruu lau. Ma 'ana si kada nia e ruu, nia kasi ngalia mai na 'abuna doo fai 'ae gi go 'ana iilingia gout)(gi fai nia bulumakau 'uria na kwaisuusilaa. Ma nia e ruu lau eeri nia ka falea na 'abuna i talana 'uria kwaisuusilaa, ma 'urinae nia ka aadea ka waluda fuaga 'uria toolaa 'ana mouria firi.

¹³ Ma tau na mai, sulia na taa gi na kwaieresia gi e faatolomainia, lea so ta iimola kasi faalu i maana a God, gera ka kalufia 'ana 'abuna gout)(ma bulumakau ma na fua 'ana gale bulumakau, ma 'ana malutaa nae, gera ka faafaalu nia.

¹⁴ Haia, ma lea so ka waluda go 'ana fuana iimola naa ka faafaalua go 'ana 'ana 'abuna bulumakau fai nia gout)(gi, 'urinae e tasa lea so nia ka faalu 'ana 'abuna Christ. Sulia na kwai'adomilana Aanoedoo Aabu na e totoo si sui, Christ e kwaisuusi 'ana nonina i talana fuana God sui, ma nia langi si too go 'ana ta garolaa. Ma sulia na 'abuna, nia ka lafua na garolaa gia gi sui ma na kwaitagofalelaa gia 'ana maluta tatagwai gi, eeri gia ka fooma fuana God na e mouri mamana.

¹⁵ Haia, ma sulia e 'urinae, a Christ naa na wane baita 'usia na tala faalu nae, eeri na tooa na a God e soe gera, tara gera ka ngalia na mouria firi na a God ka bae aalualu 'ana. E waluda go 'ana fuana a God ka iili 'urinae, sulia na maelana Christ. Ma sulia na maelana Christ, a God e lafua na garolaa gera tooa gi da iilida 'ana si kada na tala totongenao e baita 'ua.

¹⁶ Haia, muka manata fasi sulia na wane na e too ma ka kedeaa tee 'abedoo ma ka haea 'ana lea so nia ka mae, tei naa tara ka ngalia na totodaa nia gi. 'Ana si kada nia e mae 'ana, e too fuana ta wane aai lau haia ka faamamanaa na nia e mae. Haia, 'urinae fetei na wane na nia e bae sulia i laona 'abedoo nae kafi ngalia na totodaa nae gi.

¹⁷ Ma lea so nia ka mouri 'ua, na doo baa e kedeaa e 'afetai 'ua ka fuli. Ma lea nia ka mae fetei, na doo nae gi nia bae sulia kafi fuli. ¹⁸ Nia e 'urinae

laugo 'ana tala baa i nao boroi a God e aalua, na malutaa nae kasi fuli lea ka dao 'ana si kada gera haungia ta doo fai 'ae. ¹⁹ A Moses e faatolomainia na tooa i nao gi sulia na kwaieresia gi sui. Sui nia ka ngalia 'abu faasia na bulumakau gi fai nia na gout)(gi, ma ka dolalia 'ana kafo. Sui nia ka lolomainia na iifuna sipsip na da faakekeroa ma na harana 'ai na gera 'alangia 'ana hisop. Ma i nia ka kalufia na buka na da kedea 'ana kwaieresia nae gi ma ka kalufia na tooa gi laugo. ²⁰ Ma a Moses ka bae 'urii, <<Na 'abu naa, nia na mamalafooa 'ana faarigitalana tala na a God e eeresi gamu 'uria na roosulilana.>> ²¹ Nia ka 'urinae laugo a Moses e kalufia na Beu Aabu na da haungainia 'ana maku, ma ka kalufia laugo na doo gi sui i laona 'uria na foasilana a God i seenae. ²² Ma e 'urinae laugo, na kwaieresia gi ka haea na e too fuana faafaalulana na doo 'oro gi 'ana 'abu. Ma 'urinae laugo, lea dasi haungia ta doo momouria eeri na 'abuna ka busu, e 'afetai a God ka manata lukea na garolaa ta iimola.

Kwaisuusia Christ na e lafua garolaa gi.

²³ Ma na doo gi 'uria foasilana a God i aano na da iilingia nununa go 'ana doo mamana gi mai i langi, na tooa daka faafaaluda 'ana 'abu 'urinae. Sui na doo mamana gi mai i langi ka dooria na kwaisuusia na e diana ka tasa. ²⁴ Sulia 'ana si kada a Christ e falea na kwaisuusia nia fuana a God, nia kasi ruu mai laona Beu Aabu na tooa gi da tolea na e iilingia nununa go 'ana na Beu Aabu mamana i langi. Ma lau 'ana, nia ka lea i langi, ma i seenae nia ka too fai nia a God 'uria na 'adomilaga. ²⁵ Haia, na Fooanigwou fuana

tooa Jiu gi, nia haitamana ka ruu lao <<gula aabu fifii>> 'ana Beu Aabu see gi aano 'ana tee si kada laona tee fe ngali 'uria falelana kwaisuusia 'ana 'abuna doo fai 'ae. Ma a Christ mone, nia langi kasi ruu 'ana si kada 'oro 'uria falelana na kwaisuusia 'ani nia i talana. ²⁶ Sulia lea so ka 'urinae, 'ita mai 'ana hafalilana haungailana na molaagali nia ka nonifii 'ana kada 'oro. Ma lau 'ana, 'ana si kada 'i'isi nae gi, nia e faatai mai 'ana tesi kada go 'ana eeri nia ka lafua garolaa gi sulia na falelana kwaisuusia 'ana nonina i talana. Ma ka langi si iili 'urinae lau. ²⁷ Haia, ma na iimola la molaagali nae, nia e mae 'ana tesi kada go, sui tara a God ka keto nia. ²⁸ Ma 'urinae laugo, a Christ e mae 'ana tee si kada go 'uria kwaisuusia ni lafulana na garolaa gera tooa 'oro gi. Ma tara nia ka ooli lau mai seegi aano, langi lau fuana lafulana garolaa gi, ma 'uria nia ka faamouria na tooa na da kwaimaasimaasi nia.

10

¹ Na kwaieresia gi na a Moses e faleda, nia na nununa go 'ana. Ma na doo mamana naa gi e diana ka tasa na tara ka dao mai. Na kwaieresia gi haea gera ka falea kwaisuusia 'ana fe ngali sui ka lea firi. Nia naa, gia ka haitamana na kwaieresia gi 'urinae faasia a Moses e 'afetai go ka 'olosia na tooa gi na gera fooasia a God. ² Sulia lea so hasa na tala nae ka aadea tei gera na da fofooa gera ka faalu naa, doo langi dasi bobola naa lau 'uria falelana lau ta kwaisuusia, sulia gera haitamana a God tara ka manata lukea na garolaa gera gi sui ma gera ka langi si liobukonu

naa lau. ³ Haia, ma sulia fe ngali gi sui na kwaisuusilaa gera gi e faamanatatoos gera 'ana garolaa gera gi. ⁴ Sulia e 'afetai go fuana 'abuna bulumakau gi fai nia na gout)(gi ka lafua na garolaa gia gi.

⁵ Nia naa, 'ana si kada a Christ e garangi ka lea mai lao molaagali, nia bae fuana a God ka 'urii, <<E langi lau kwaisuusia 'ana doo fai 'ae gi na 'o dooria, ma lau 'ana 'o haungai nia ta noni fuagu ma nia na 'o dooria 'uria na falelana kwaisuusia. ⁶ Sulia 'osi eele go sulia na kwaisuusia gi 'ana doo fai 'ae gi na da naarea ma na 'abuna doo fai 'ae gi 'uria na lafulana garolaa gi. ⁷ Sui, nau ku haea, <God 'ae, nau na ku too seegi, eeri kuka iili sulia taa gi na 'o dooria, iilingia gera kekede naa suli nau i laona Kekedelaa Aabu.>>> ⁸ Haia, nia e haea i nao a God e langi kasi dooria go na falelaa gi ma na kwaisuusia na da naarea ma na 'abuna doo fai 'ae gi 'uria na lafulana garolaa gi. Ma i nia ka langi si eele sulia na doo nae gi. Ma i nia e bae 'urinae, sui boroi 'ana na kwaieresia a Moses gi da bae sulia kwaisuusia nae gi. ⁹ Ma nia ka bae lau 'urii fuana a God, <<I nau i seegi, eeri kuka iili sulia taa gi na 'o dooria.>> Ma sulia na baelaa nae, gia haitamana a God e lafua na tala totongenao, ma ka oolisia na 'ana na kwaisuusia 'ana Christ. ¹⁰ Ma i sulia a Jesus Christ e iili sulia na kwaidooria nia God, a God ka lafua na garolaa gia gi ma ka faafaalu gia. Nia 'urinae, sulia kwaisuusia a Christ 'ana nonina i talana 'ana tee si kada go, ma ka langi si kwaisuusi naa lau 'ana nonina.

¹¹ Ma 'ana tala baa 'ua mai nao, na fataabu

gera Jiu gi da ruu i laona Beu Aabu sulia dani, ma gera ka iilia na raolaa gera 'ana kwaisuusilaa 'ana si kada 'oro gi. Sui taa, na kwaisuusia naa gi da iilia langi dasi bobola 'uria lafulana go na garolaa gera na tooa gi. ¹² Ma a Christ mone, nia falea kwaisuusia nia 'ana tesi kada go 'uria lafulana na garolaa gi. Ma nia kasi dooria falea ta kwaisuusia lau 'ana tesi kada 'ete. Ma 'ana si kada nia e falea na kwaisuusia nia sui, nia ka gwouru i bali aaolo 'ana a God, sulia na raolaa nia 'uria na kwaisuusilaa e sui naa. ¹³ Ma a Christ e too 'ua go 'ana i seenae i tara'ena, si kada nia e kwaimaasimaasia tesi kada tara a God ka firu liufia na maalimaea nia gi. ¹⁴ Haia, sulia tee kwaisuusia nae, nia ka lafua na garolaa gia gi, ma nia ka aadea gia ka 'o'olo too firi.

¹⁵ Ma na Aanoedoo Aabu e bae faamamanaa lau sulia na doo nae gi 'urii, ¹⁶ <<I nau a Lord, ma tara kuka aalua na tala faalu naa fuada 'uria faamourilada 'urii: Tara kuka aalua na kwaieresia nau gi i laona manatada, ma kuka kedea la mourilaa gera.>> ¹⁷ Ma na Aanoedoo Aabu e bae lau 'urii, <<Na garolaa gera gi ma na aade ta'alaa gera gi, tara kuka manata lukeda ma e 'afetai kuka manata naa lau sulia.>> ¹⁸ Haia, si kada a God e manata lukea na doo nae gi sui, e langi kasi bobola 'uria na falelana naa lau ta kwaisuusia 'uria lafulana garolaa gi.

Gia lea garangi mai siana God.

¹⁹ Haia, waihaasi gi 'ae, sulia na maelana a Jesus, gia haitamana gia ka lea rara'a 'uria na ruulaa lao <<gula aabu fifii>>. ²⁰ Sulia a Jesus e haungainia na tala faalu fuaga 'uria lealaa mai

siana a God, eeri gia ka mouri fai nia too firi. Nia iili 'urinae 'ana na kwaisuusilaa 'ana nonina. ²¹ Gia too naa 'ana fataabu diana 'asianaa na e baita 'usia beu a God. ²² Ma sulia doo nae gi, gia ka dao naa siana a God fai nia na fooalaa na e mamana ma na fimamanalaa na e ngasi ma na manataa na e faalu sulia gia haitamana a God na e faafaalu gia naa sulia a Jesus. Ma gia ka siuabu laugo 'uria faatailana a God e faafaalu gia. ²³ Ma gia ka tasa dongaa 'ana kwaimaasi ngadolaa 'uria na doo baa gi a God ka bae aalualu 'ana fuaga, sulia gia haitamana tara nia ka faamamanaa na baelana. Nia naa doo gi gia ka haea fuana tooa gi. ²⁴ Ma gia ka manata sulia na kwaidooria gia kwailiu, eeri gia ka 'adomi gia kwailiu, ma gia ka faatania na rakedianalaa fuaga kwailiu 'ana doo diana gi gia ka iilida. ²⁵ Haia, ma gia ka langi si too faasia na oofuofua fai nia fooalaa fuana God, iilingia teni tooa da iilia. Ma lau 'ana, gia figu oofu eeri gia ka aare gia kwailiu, sulia gia ka haitamana na maedani oolilana mai a Lord Jesus e garangi naa.

²⁶ Sulia lea so gia ka haitamana sui naa na faatolomaia na e mamana gi, ma gia ka iili go 'aga 'ana doo gi na e garo, tama e langi ta kwaisuusia kasi bobola fai nia lafulana garolaa gia gi. ²⁷ Ma lea so ta iimola ka iili 'urinae, nia ka mou sulia nia ka maasia na 'ana kwakwaea baita ma na eere 'ago'ago na God tara ka labasia 'ana ni tei gera na da take 'usi nia 'ana. ²⁸ Ma so ni tei 'ua mai nao na e aaburongo go 'ana 'ana na kwaieresia gi faasia a Moses, ma lea so ta

oolu wane ma langi ta roo wane ka faamamanaa na wane nae e garo, langi dasi manatai nia e diana fuana, daka haungia 'ua go. ²⁹ Ma lea so ka 'urinae fuana kwaieresia gi faasia a Moses, na kwaelaa e baita ka tasa fuana ni tei na i tara'ena ka oote nia 'ana na Wela a God. Sulia na aabulolana na iimola 'urinae nia faatania nia manata hasa na maelana a Christ e langi si liu baita go, boroi 'ana na kwaisuusi nae 'ana tala faalu haitamana ka faafaalu nia. Haia, na iimola 'urinae iilingia nia bae tolingia na Aanoedoo Aabu na e rakediana fuana. ³⁰ Sulia gia haitamana a God e bae 'urii, <<I nau tara kuka duu, i nau naa kuka falea kwakwaea fuana tooa gi sulia na aade ta'alaa gera gi.>> Ma na Kekedelaa Aabu ka bae lau 'urii, <<A Lord tara ka ketoa na tooa nia gi.>> ³¹ Haia, lea a God na e mouria ka falea kwakwaea fuana ta iimola, na iimola nae tara ka mou 'asianaa.

³² Haia, muka manata fasi sulia e tau 'ua na mai 'ana si kada na raralaa a God e talafi gamu ma muka manata mamana 'ana a Christ. 'Ana si kada nae, sui boroi molu liufia na 'afetailaa baita, tara ka langi si lafua na fiimamanalaa gamu. ³³ Daka faafii gamu ma daka bae iiseri 'ani gamu maana iimola 'oro gi. Ma 'ana teni si kada, gamu ka maabe 'uria na 'adolaa fai gera tooa kwaimaani gamu gi na da iinokesi gera 'urinae. ³⁴ Haia, ma 'ana si kada na tooa gi na da manata mamana da too lao beu ni kanilaa, muka manataida ma muka 'adomida. Ma muka eele go 'agamu 'ana si kada tooa gi da laua na totodaa gamu gi sui, sulia mu haitamana mu too 'ua 'ana totodaa gi na e diana ka tasa mone

mai langi na e totoo firi. ³⁵ I 'aena naa, langi molu si mou. Sulia lea so muka tagofale rigita 'ana a God, tara muka ngalia na kwaiaraa nia fuagamu na e diana tasa. ³⁶ Muka too 'ana gwaromaabelaa, eeri muka iili sulia kwaidooria a God, ma muka ngalia na doo gi na nia e bae aalualu 'ana fuagamu. ³⁷ Sulia na Kekedelaa Aabu e bae 'urii, <<E langi si tau tara nia ka lea mai, ma tara nia ka langi si tau. ³⁸ Ma na tooa 'o'olo nau gi tara gera ka manata mamana ma daka mouri. Haia, ma lea so ni tei 'ada na ka sigitau sulia gera mou, tara kusi eele go sulia gera.>> ³⁹ Haia, ma i gia, gia langi si iilingia na iimola gi na da ngalia kwakwaelaa sulia da lea sigitau 'urinae. Sulia a God e faamouri gia sulia na fiimamana gia gi.

Fiimamana.

11

¹ Lea so gia ka fiimamana 'ana God, gia ka haitamana tara gia ka ngalia doo diana gi na gia kwaimaasi ngado maasida, boroi 'ana gia ka langi si rikida 'ua. ² Haia, ma na tooa gi 'ua mai nao, a God e aalafaafi gera sulia na fiimamanalaa gera 'ani nia.

³ Sulia na fiimamanalaa gia gi, gia ka haitamana a God e haungainia na doo gi sui 'ana na baea go 'ana. Na doo gi sui na gia rikia e 'ita mai faasia na doo gi na e langi gia si rikida, sulia a God naa e haungaida.

⁴ A Abel baa e tau na mai, sulia na fiimamanalaa nia 'ana God naa, nia ka falea na kwaisuusia nia fuana a God ma ka diana liufia na

kwaisuusia na 'aua nia Kein e falea. Ma sulia na fiimamanalaa a Abel, a God ka haea nia e 'o'olo, sulia a God e aalafaafia na falelaa nia gi. Sui boroi 'ana a Abel ka mae 'ua na mai, tee si doo na e faatolomai gia 'ana sulia na fiimamanalaa nia.

⁵ Ma a Enok laugo, sulia na fiimamanalaa nia, nia ka langi si mae, sulia a God e ngali nia 'uria i langi, ma e langi ta iimola i aano ka rikia lau a Enok. Ma na Kekedelaa Aabu e haea a God e eele 'asianaa sulia a Enok, ma a God kafi ngali nia 'uria i langi. ⁶ Lea ta iimola naa kasi too 'ana fiimamanalaa 'ana God, e 'afetai go hasa a God tara ka eele sulia. Sulia ni tei na e lea mai siana a God, nia ka fiimamana 'ana God na e too ma ka faadianaa na tooa na da nani 'uri nia.

⁷ Ma Noa laugo, sulia na fiimamanalaa nia, nia ka faarongoa 'ana bae fifilana a God fuana sulia na funua tara ka dao. Nia ka manata mamana, boroi 'ana nia kasi rikia 'ua go na funua nae. Nia ka roosulia a God, ma ka kasia tee baru baita. Ma si kada na kafo baita e fungu mai, nia fai nia na tooa nia gi daka mouri ma ka langi dasi kuruu. Ma sulia na fiimamanalaa a Noa, nia ka faatainia na ta'alaa na tooa aai gi ma daka bobola 'uria ngalilana na kwakwaea. Ma a God ka haea a Noa e 'o'olo sulia na fiimamanalaa nia.

⁸ Ma a Abraham laugo, sulia na fiimamanalaa nia, nia ka roosulia na baelana a God 'ana si kada nia oodua haia ka lea faasia maefera nia 'uria ta fera aai lau 'ana gano a God e bae aalualu haia ka falea fuana. Nia na a Abraham ka tafusia maefera nia, sui boroi 'ana nia ka langi si haitamana 'ua nia lea i fai. ⁹ Ma si kada nia e dao 'ana fera nae a God e bae aalualu 'ana,

nia ka too iilingia na fera nae langi lau na fera nia, ma nia ka too go 'ana lao babala 'ana maku go 'ana gi. Nia ka 'urinae laugo 'ana wela nia Aesak e iilida gi, ma koo nia a Jakob. Daaro ka haitamana laugo na bae aalualua na a God e haea fuana a Abraham e doo fuadaaro laugo. ¹⁰ Sulia a Abraham e maasia na fera diana na a God e haungainia i langi na e 'afetai ka funu too firi.

¹¹ Ma sulia na fimmamanalaa nia, a Abraham ka bobola fai nia ka too 'ana wela, sui boroi 'ana nia ka waro, ma na 'afe nia ni Sara laugo ka 'aba'ato. Ma daaro ka too 'ana wela, sulia daaro manata mamana 'ana a God tara ka faamamana na bae aalualua nia. ¹² Boroi 'ana a Abraham ka waro ma iilingia garangia mae, daaro ka too 'ana kwalafaa 'oro 'asianaa gi. Gera 'oro iilingia na bubulu gi i mamangaa ma na oone i kamena aasi, sulia e 'afetai 'uria na iidumilana.

¹³ Haia, na tooa nae gi da manata mamana 'ana God, sui boroi 'ana gera ka mae suifetei daka ngalia taa gi na God e bae aalualu 'ana fuada. Ma gera ka manata sulia na doo nae gi a God e bae aalualu 'ana, ma gera ka haitamana tara gera ka ngalia 'ana si kada 'ete. Ma gera ka haea laugo na gano na gera too 'ana, e langi lau na fera gera, sulia na fera mamana gera naa e nii mai langi. ¹⁴ Haia, ma na tooa gi na da bae 'urinae gera faatania gera kwaimaasi ngado 'ada 'uria na fera mamana gera. ¹⁵ Ma a Abraham ma na lului tooa nae gi laugo dasi manata naa hasa na fera gera baa da tafusia. Sulia lea e 'urinae, e bobola go 'ana fuada 'uria oolilaa i seenae. ¹⁶ Ma

lau 'ana, gera ka nani 'uria na fera diana liufia na fera baa gera tafusia, sulia gera kwaimaasi 'uria na fera gera i langi. Sulia na doo nae na, a God e eele 'ana si kada gera 'alangi nia 'ana God gera, sulia nia aade aagau sui naa 'ana fera gera ni toolaa mai i langi.

¹⁷⁻¹⁸ Haia, gia haitamana a God e bae aalualu fuana Abraham, sulia na wela nia Aesak na kwalafaa nia tara ka 'oro 'asianaa. Ma 'ana si kada God e iilitoona na fiimamanaa Abraham, nia ka haea fuana ka haungia Aesak 'uria kwaisuusia. Ma na fiimamanalaa Abraham e rigita fafona na bae aalualua a God fuana, ma nia ka aade aagau 'uria haungilana wela nia Aesak 'uria kwaisuusilaa. ¹⁹ Sulia manata Abraham hasa lea so a Aesak ka mae, a God bobola ka tae nia faasia na maea. Ma nia iilingia a God e faamouria a Aesak mamana.

²⁰ Haia, Aesak laugo, sulia na fiimamanalaa nia 'ana God, nia ka faadianaa na roo wela nia Jakob fai nia Esau, ma ka faarongo 'ana taa na ka dao fuadaaro.

²¹ Ma a Jakob laugo, sulia na fiimamanalaa nia, nia ka faadianaa na wela wane a Josef gi 'ana si kada a Jakob garangia maelana. Sui nia e 'agwaaro fafona 'ai ni kubou)(nia, ma ka foasia God.

²² Ma a Josef laugo, sulia na fiimamanalaa nia, 'ana si kada e too naa maasia na maelana, nia bae ka haea na kwalafaa gera Jiu gi tara daka lea faasia fera Ejipt. Ma nia ka oodu gera laugo 'ana si kada nae, lea kada na da 'idu 'ana, gera ka ngalia laugo na rae 'ana nonina fai gera.

²³ Haia, ni tee fai nia maa nia Moses laugo, daaro too 'ana fimamanaa e baita 'ana God. Sulia boroi 'ana na aaofia i Ejipt ka haea gala wela wane gera Jiu gi gera ka haungida, daaro si mou go, ma si kada Moses e futa 'ana, daaro ka haufinia sulia oolu sinali, eeri hasa dasi haungia, sulia na wela nae na rikilana e diana 'asia go.

²⁴ Ma a Moses e too laugo 'ana fimamanaa 'ana God, sulia si kada e baita mai, nia ka oote nia daka 'alangi nia 'ana wela nia na haari na aaofia na e sului nia. ²⁵ Ma a Moses e dooria ka too ni nonifia 'ana fai gera tooa a God gi, faasia na toolaa ni eelea 'ana garolaa lao molaagali naa langi kasi tau ka sui laugo 'ana. ²⁶ Ma nia ka manata hasa e diana fuana gera ka iinokesi nia sulia na fimamanalaa nia 'ana na Aaofia na a God tara ka oodua mai. Ma nia kasi manata sulia na toolaa 'ana totodaa baita na e bobola ka ngalia i Ejipt. Sulia nia e maasia naa 'ana doo diana gi na a God tara ka falea fuana 'ana si kada e nia 'ua mai.

²⁷ Ma sulia na fimamanalaa a Moses, nia ka lea faasia Ejipt, ma ka langi si mou go 'ana rakehasua na aaofia i Ejipt. Nia iilingia e rikia a God na e talai nia, ma nia ka langi si ooli naa 'uria i Ejipt. ²⁸ Ma sulia na fimamanalaa a Moses, nia ka haungainia tee maoma 'ana Lofogaua, ma ka haea fuana tooa i Jiu gi gera ka kalufia na maa gi 'ana luma gera gi 'ana 'abuna gale sipsip, eeri na ensel na a God e oodua mai kasi haumaelia na uulunao 'ana wela wane gera gi, ma ka lofogaua 'ana na luma gera gi.

²⁹ Ma sulia na fimamanalaa na tooa i Jiu gi, nia aadea gera ka bobola 'uria lea folosilana na

aasi baita na da 'alangia 'ana Aasi Kekeroa. Sulia a God e iidua na kafo eeri gera ka bobola 'uria fali fololaa iilingia gera fali fafona gano lalanga. Haia, ma 'ana si kada na tooa i Ejipt gi da tarida kou, daka lola teefou, sulia a God na e aadea na aasi baita na e toli lau mai faafi gera.

³⁰ Haia, ma sulia na fiimamanalaa na too Jiu gi laugo 'ana si kada gera dao 'ana fera i Jeriko, gera ka fali galia na sulufou nae sulia fiu maedani, sui a God ka kwae oogosia na sulufou nae hae gano.

³¹ Ma tee geni sesele na e too lao maefera nae Jeriko, na hatana ni Rahab, nia na aai fiimamana laugo 'ana God. Sulia 'ana si kada roo wane gi a Moses e ooduda mai daaro dao aagwa mai 'uria daotoolana rigitaa gera fera nae, ni Rahab ka 'adomi daaro. Sui 'ana si kada na tooa i Jiu gi da hau teefou 'ana tooa na da aaburongo 'ana a God, ni Rahab daka langi si haungia.

³² Haia, nau ku mamalo fasi see 'uria na uunulaa naa, sulia e langi kusi too naa tesi kada 'uria na bae lau sulia na fiimamanalaa gera na tooa mala Gideon, Barak, Samson, Jefta, David, Samuel, fai gera na profet gi. ³³ Sulia na fiimamanalaa gera 'ana a God, bali 'ada gi daka firu liufia tooa 'oro ni firua lao fera baita gi. Ma teni tooa 'ada da iilia doo 'o'olo gi ma daka ngalia naa taa gi na God e bae aalualu 'ana. Ma bali 'ada 'ana si kada gera too garangia na fai 'ae kwasi gi na da 'alangia 'ana lion, langi dasi 'aleda go. ³⁴ Ma ta bali 'ada lau, sulia na fiimamanalaa gera, na eere 'ago'ago baita si harufida go. Ma ta bali 'ada lau, na maalimaea gera gi langi gera si bobola 'uria haumaelilada.

Ta bali 'ada da makeso, sui daka rigita lau sulia na fiimamanalaa gera gi. Daka ramo kada da firu 'ana, ma daka naga teefou 'ana tooa ni firu gera na maalimaea gera gi. ³⁵ Ma teni geni gi laugo 'ua na mai, na fiimamanalaa gera e baita ma sulia e 'urinae na wela gera gi na da mae daka tatae faasia na maea.

Haia, ma teni tooa gi lau na da manata mamana 'ana God 'ua na mai na da dumuli gera. Ma boroi 'ana na maalimaea gera gi da haea tara daka lukeda lea daka lugasia na fiimamanalaa gera, e langi dasi oolitai manata, ma gera ka hau fifi 'ani gera lea daka mae. Sui tara a God ka tatae gera 'uria na mouria na e diana ka tasa. ³⁶ Ta bali 'ada, na maalimaea gera gi da faa'ida gera ma daka rabusi gera. Ma ta bali 'ada, gera ka kani faafida 'ana 'oko halo, sui daka aalu gera lao beu ni kanilaa. ³⁷ Bali 'ada laugo, da 'ui fouda lea daka mae. Ma teni tooa gi lau da furi roo kade doo 'ani gera. Ma ta bali 'ada da labu gera 'ana naefe baita sulia na fiimamanalaa gera. Ma ta bali 'ada na maku na da oofi 'ana naa 'ungana sipsip fai nia gout,)(sulia gera siofaa 'asia go. Ma na maalimaea gera gi daka iinokesi gera ma daka sinatai gera. ³⁸ Haia, na tooa aabulo ta'a gi lao molaagali naa langi gera si faorana na toolaa kwailiu fai gera tooa 'o'olo naa gi. Ma teni tooa 'ada gera tafusia na luma gera gi, daka liu kwailiu go 'ada iilingia na iimola gi langi gera si too 'ana ta fera. Daka too i laona aanogwou gi, ma i gwou na tolo gi, ma lao maa 'ufi, ma laona kilu gi laona gano.

³⁹ Haia, God e eelee baita 'asianaa faafia na tooa

nae gi, sulia na fiimamanalaa gera. Sui boroi 'ana doo nae gi ka fuli 'ani gera, dasi ngalia 'ua taa gi na a God e bae aalualu 'ana fuagera. ⁴⁰ Sulia a God e manata sulia doo diana e too 'ua fuaga. Sulia nia ka dooria tooa nae gi gera ka too maasia eeri gia ka 'ado laugo fai gera, 'ana si kada nia ka falea na doo diana gi na nia e bae aalualu 'ana.

God a Maa gia.

12

¹ Haia, ma na tooa 'oro na da manata mamana 'ana a God 'urinae, nia iilingia gera too fai gia 'ana si kada nae, ma gera ka aadaada 'uria na taa naa gi gia ka iilida. Nia naa gia ka eekwatania na doo gi sui na e lui gia ma na garolaa gi na e dau rigita faafi gia. Sulia gia iilingia na tooa na da lalao 'ana labalaa baita. Ma gia ka lalao rigita lea gia ka dao 'ana gula faasuilaa gia. ² Ma gia ka lea sulia a Jesus, sulia i nia na gwoufutana fiimamanalaa gia. 'Ana si kada gera fotoia 'ana 'airarafolo, nia kasi eekwatania na kwaidooria a God. Ma nia kasi manata sulia na iidalaa)(sulia maelaa 'urinae. Ma lau 'ana, nia ka manata sulia na eelelaa na tara nia ka too 'ana i langi. Ma 'ana si kada naa, i nia e gwouru naa i bali aolo)('ana lifu ni gwourua 'ana 'initooa nia a God.

³ Muka manatatoona na 'afetailaa baa gi gera iilida 'ana Jesus 'ana si kada na tooa ta'a gi da mamagutai nia. Nia naa, na manatalagamu kasi 'asia sulia na 'afetailaa gamu gi, ma lau 'ana muka faarigita na fiimamanalaa gamu. ⁴ Sulia boroi 'ana gamu ka firu fai nia na ta'ala, e langi

ta iimola 'ani gamu gera kasi haungia go sulia na fiimamanalaa nia. ⁵ E langi musu manata buro 'ana na baea ni kwaiareia baa gi a God e haea fuagamu na wela nia gi, baa e 'urii, <<Wela nau 'ae, 'oko fafurongo diana si kada a Lord e ngatafi 'oe. Ma si kada nia ka faatolomai 'oe, na manatalamu kasi 'asia. ⁶ Sulia a Lord e ngatafia na tooa gi na nia rakediana fuada. Ma nia ka falea kwakwaelaa fuana tooa gi na nia aalafaafida haso na wela nia gi.>> ⁷ I 'aena naa na, lea so tesa taa na e 'afetai gamu ka lio 'ana i tara'ena, muka faalamainia 'agamu, iilingia a maa gamu naa e falea kwakwaelaa fuagamu. Na 'afetailaa gamu ka faatainia a God e aade iilingia na wela nia gi 'ani gamu. Sulia gia haitamana na maa gi sui da falea kwakwaelaa fuana wela gera gi 'ana teni si kada. ⁸ Lea so e langi molu si ngalia go ta kwakwaelaa faasia God, iilingia na wela aai nia gi, tama gamu langi lau na wela fifi nia gi, ma mu iilingia go 'agamu na wela da iiana hala 'ana gi. ⁹ Ma iilingia na maa gia see gi lao molaagali, 'ana si kada gera falea kwakwaelaa fuaga, gia ka faabaita gera. E 'urinae gia ka faabaitaa ka tasa a Maa gia na e too mai langi. Lea so gia ka aade 'urinae, gia ka too 'ana mouria too firi. ¹⁰ Haia, na maa gia gi lao molaagali naa i aano, gera falea na kwakwaelaa fuaga sulia kada kukuru go 'ana, sulia na malutaa gi daka manata e diana. Ma na malutana a God ka falea kwakwaelaa fuaga eeri nia ka 'adomi gia, eeri gia ka lea 'olo laugo iilingi nia. ¹¹ Ma 'ana si kada gia ngalia na kwakwaelaa, gia ka liobukonu sulia gia manata hasa na kwakwaelaa na doo ta'a. Sui, i

buirea na kwakwaelaa, gia ka haitamana tara gia ka too 'ana fanualama sulia na aabulolaga tara ka 'o'olo.

Na bae toolamaia gi lau.

¹² 'Aena naa na, muka aare gamu i talagamu, ma muka faangasia na fiimamanalaa gamu.

¹³ Ma muka lea sulia na tala 'o'olo, eeri na tooa gi na fiimamanalaa gera gi e makeso dasi lugasia na fiimamanalaa gera, ma lau 'ana na fiimamanalaa gera gi ka ngasingasia.

¹⁴ Haia, muka iiliili 'uria toolaa 'ana fanualama fai nia tooa gi sui. Ma muka hasi rigita laugo eeri na aabulolaa gamu gi ka 'o'olo teefou. Sulia lea so na mourilaga e langi si 'o'olo, e 'afetai gia ka rikia a Lord. ¹⁵ Molu hasi rigita eeri langi ta iimola 'ani gamu kasi oote nia 'ana na rakedianalaa a God. Ma langi musi faalamainia ta iimola 'urinae ka labasia na kwaimaanilaa gamu gi, iilingia ta 'ai baa e too 'ana fuedoo gi ma ka bubulo ma ka labasia na tooa gi. ¹⁶ Ma langi si diana lea ta iimola 'ani gamu na aabulolana e bilia ma ka lea 'e'ete 'ana faasia God. A Esau e aabulo 'urinae 'ua na mai, sulia na mamanaa nia wela wane uulunao ka faafoli 'ana 'uria na fanga go 'ana. ¹⁷ Ma gia haitamana, i buirea naa, a Esau kafi dooria na maa nia ka faadiana nia. Sui na maa nia e oote nia 'ani nia, ma ka faadianaa 'ana na haasina, sulia e 'afetai naa fuana 'uria oolilaa fai nia doo gi na e faafoli sui naa 'ana, sui boroi 'ana nia ka gafegafea maa nia fai nia na aangilaa.

¹⁸ Na tala 'uria daolaa siana God na gia lea sulia, e langi kasi uusulia na tala na koo gia Jiu

gi i nao. Sulia na doo na da dao garangia na doo na da rikia ma daka hamotoona. Sulia i seenae na tolo i Saenae na e haru 'ana kwesu. Ma ka rorodoa i seenae, ma na ooru ka 'ufu)(rigita. ¹⁹ Ma gera rongoa na lingeena bungu ma na lingeena riilaa baita a God. Ma 'ana si kada tooa nae gi da rongoa na lingeedoo nae, gera ka mou ma daka 'ingo 'ana haia ka too faasia baelaa lau. ²⁰ Sulia gera mou 'asianaa 'ana baelaa 'urii, <<Lea so ni tei, ma langi na doo fai 'ae gi boroi 'ana e hamotoona fe tolo naa, tara muka haungia 'ana 'uilana 'ana fou.>> ²¹ Ma sulia na doo gi na da rikida gi 'ana si kada nae e kwaifaamouri 'asia go, a Moses boro e haea, <<Nau ku lebelebe sulia ku mou.>>

²² Ma i gia 'ana si kada naa, i gia langi si dao garangia na doo 'urinae. Sulia gia gi dao naa 'ana tolo i Sion, na fera a God na e mourii. I nia naa na fera baita i Jerusalem mai langi, si gula na figulaa 'ana molee ensel gi da too 'ana. ²³ Gia figu mai fai nia na wela uulunao gi a God na da eele 'asianaa, ma na hatada da kedea mai langi. Ma gia ka dao naa siana a God, na wane na e ketoa na tooa gi sui. Ma gia ka dao naa laugo siana na mangoda tooa diana gi na a God e 'olosida. ²⁴ Ma gia ka dao naa siana a Jesus, na wane na e haungainia na tala faalu fuaga siana a God na e 'olosi gia. Sulia na 'abuna na e iigwa, tara gia ka ngalia na doo diana gi liufia na doo gi na 'abuna a Abel e haitamana ka falea.

²⁵ I 'aena na muka fafurongo diana 'ana baelana God. Sulia na tooa baa gi da oote gera 'ana fafurongolana a God i seegi aano, gera ka

ngalia na kwakwaelaa baita. 'Urinae laugo, lea gamu ka oote gamu 'ana baelaa nia faasia langi, tara gamu ka ngalia na kwakwaelaa laugo. ²⁶ E tau na mai, na molaagali naa e gelo sulia na lingee baitalana God. Sui 'ana si kada naa, nia ka bae aalualu ka 'urii, <<Nau tara ku gelo na molaagali naa fai nia i langi laugo.>> ²⁷ Ma ta baelaa <<lau>> e faatainia tara a God ka gelo na doo gi na nia haungainia, ma ka lafuda teefou, eeri na doo gi na e ngado go nia na doo gi ka too 'ua.

²⁸ I 'aena naa, e too fuaga sui gia ka baelafea a God, sulia gia e too lao 'Initooa na e ngado teefou. Gia ka fooasia God 'ana malutaa na nia ka dooria fai nia faamoulaa lau. ²⁹ Sulia a God gia e haitamana ka labasia na tooa gi 'ana eere.

Malutaa gi na God e eele sulia gi.

13

¹ Muka tasa dongaa 'ana rakedianalaa fuagamu kwailiu, sulia gamu too go 'ana tee Maa na e too mai i langi, ma gamu ka iilingia na bare waihaasi gi. ² Langi musi manata buro 'ana na gonitailana na tooa dao gi. Sulia teni tooa na da ili 'urinae daka gonitainia na ensel gi, sui boroi 'ana dasi haitamana. ³ Haia, musi manata buro laugo 'ana tooa na da too lao beu ni kanilaa. Muka aadasuli diana 'ani gera, iilingia mu too fai gera lao beu ni kanilaa. Ma muka 'adomia laugo na tooa na da too 'ana 'afetailaa gi iilingia mu too laugo 'ana 'afetailaa fai gera.

⁴ Haia, e diana fuana i gamu sui muka faabaita na oofuofua 'ana kwaisitoolalaa. Nia e diana

fuana gamu sui gamu ka too faasia na garolaa 'ana ooea. Sulia God tara ka falea na kwakwaea fuana ni tei na aabulolana e bilia ma ka ooeoe.

⁵ Haia, muka suusuli gamu, aata na doorilaa gamu 'ana malefo ka baita. Ma lau 'ana, muka eele sulia na taa gi na mu too 'ana gi. Sulia a God e haea, <<I nau tara kusi lea faasi gamu, ma nau tara kusi lugasi gamu.>> ⁶ I 'aena naa, gia ka bae rara'a 'urii, <<A Lord naa na wane na e 'adomi nau. I 'aena na tara kusi moungia tesi taa na iimola gi go 'ana daka iilia 'ani nau.>>

⁷ Langi musi manata buro lau 'ana tooa baita gamu gi mai nao na da faarongo 'ana baelana God fuagamu. Muka manata sulia na mouria diana gera gi fai nia na maelada. Ma muka iilifainia na fiimamanalaa gera gi. ⁸ Sulia a Jesus Christ e totoo si oolisi. Nia e too go 'ana iilingia baa 'ua mai, i tara'ena, ma si kada e too 'ua mai too ka tau.

⁹ Ma muka too faasia na manata mamanalaa lau 'ana faatolomaia 'e'ete gi na e langi si mamana na da faatolomai gamu 'ana. Na rakedianalaa a God tara ka faarigita na mangoga, ma e langi lau na kwaieresia sulia na fanga gi. Sulia na kwaieresia gi 'urinae e 'afetai ka 'adomia tooa gi na da roosulia.

¹⁰ Haia, na fataabu gera Jiu gi na dasi manata mamana 'ana Christ, e langi dasi too go 'ana mamanaa 'uria na 'anilana na kwaisuusia gia gi.

¹¹ Gamu mu haitamana kada na tooa Jiu gi da falea kwaisuusia sulia gera dooria na faafaalulada faasia na garolaa gera gi, na Foonigwou e ngalia mai na 'abu na doo fai 'ai gi i laona na

<<gula aabu fifi>> i laona Beu Aabu. Haia ma na nonidoo gi na da kwaisuusi 'ana, gera ka naarea i maa faasia la fera. ¹² Ma nia na aadea laugo a Jesus e mae i maa 'ana fera Jerusalem, eeri ka faafaalua na tooa faasia na garolaa gera 'ana na 'abuna. ¹³ I 'aena naa, gia ka lea laugo i maa faasia la fera i Jerusalem eeri gera ka faa'ida gia iilingia gera iilia fuana. ¹⁴ Sulia i gia langi gia si too go 'ana fera gia la molaagali. Ma lau 'ana, gia ka kwaimaasimaasia tesi kada na e ni 'ua mai tara gia ka too laona fera na tara ka dao mai. ¹⁵ Nia naa, gia ka baelafea a God 'ana si kada gi sui. Na baelafelaa gia naa na falelaa gia fuana a God, sulia a Jesus, na wane na gia haea 'ana a Lord gia. ¹⁶ Muka too faasia na manata burolaa 'ana iililaa diana ma na 'adomilaa gamu kwailiu. Sulia na aabulolaa 'urinae na e iilingia na kwaisuusia gi na a God e eele sulia.

¹⁷ Muka roosulia na tooa naonao gamu gi. Gera aadasulia na mango gamu gi, ma langi dasi mamalo 'ana, sulia tara a God ka ketoda sulia na raolaa ta'a gera gi. Ma lea so muka roosulia na baelaa gera gi, tara gera ka eele baita faafia na raolaa gera gi. Ma lea so gamu si roo go suli gera, tara gera ka liobukonu faafia na raolaa gera gi, ma e 'afetai gera ka 'adomi gamu.

¹⁸ Haia, muka tasa dongaa 'ana fooalaa fuamelu. Gemelu haitamana tesi doo ta'a si too go laona aabulolaa gemelu gi, sulia melu hasi go 'amelu 'uria iililana doo diana gi 'ana si kada gi sui. ¹⁹ Ma i nau ku gani gamu, muka fooa fuagu, eeri a God ka oolifai 'ali'ali mai 'ani nau siagamu.

Na fooalaa.

²⁰ A God naa e taea a Lord gia Jesus faasia na maea. Ma sulia na kwaisuusia Jesus 'ana maelana, nia ka aalua na wane na e aadasuli gia iilingia ta wane ka aadasulia na sipsip nia gi. Ma a God e haungainia laugo na tala faalu 'ana kwaisuusia Jesus. Ma na tala nae ka langi si sui. ²¹ Haia, nau ku fooa eeri a God na e falea fanualama tara ka falea na doo diana gi sui na gamu mu dooria eeri muka iilia na kwaidooria nia. Ma nau ku fooa laugo eeri a God ka iilia fuaga na taa gi na nia e eele faafia, sulia a Jesus Christ. Ma gia ka baelafea a Christ too ka tau too ka tau! Amen.

Baelaa 'i'isi.

²² Waihaasi gi 'ae, nau ku ii 'ani gamu haia muka fafurongo ni harofaia 'ana baelaa ni kwaiareia nau naa gi fuagamu. Sulia na kekedelaa nau naa kasi tekwa go. ²³ I nau ku dooria faarongo gamu na waihaasi gia Timothy e haga naa faasia na beu ni kanilaa. Lea hasa nia ka dao 'ali'ali mai see, tara kuka talai nia fai nau 'ana si kada ku dao kou 'ana.

²⁴ Muka falea baelaa diana gemelu fuagera tooa naonao gamu gi sui ma fuagera tooa a God gi sui na gera too siamololu. Na waihaasi gia faasia i Itali da falea laugo baelaa dianaa gera gi fuagamu.

²⁵ Nau ku fooa eeri a God ka tasa dongaa 'ana rakedianalaa nia fuagamu sui.

Lau New Testament

Lau: Lau New Testament (New Testament)

copyright © 1992 Wycliffe Bible Translators, Inc.

Language: (Lau)

Contributor: Wycliffe Bible Translators, Inc.

All rights reserved.

2020-11-23

PDF generated using Haiola and XeLaTeX on 21 Feb 2024 from source files dated 29 Jan 2022

04ff0905-6192-57c6-8d94-302e2c78a1da